

四庫全書

集部

欽定四庫全書

集部

御選歷代詩餘卷一百十一

詳校官中書臣潘有為

侍讀臣孫球覆勘

總校官進士臣朱鈐

校對官編修臣沈清藻

謄錄監生臣閻崇禮

欽定四庫全書

御選歷代詩餘卷一百十

司經局洗馬掌局事兼翰林院修撰加二級臣王奕清奉

旨校刊

詞人姓氏

明

仁宗諱高熾成祖子虛懷嗜書學問淵雅尤好宋歐陽
修之文乙夜繙閱每至達旦受詩法於贊善徐善述有

御製集上下二卷

宣宗諱瞻基仁宗子天質神敏遜志經史長篇短歌援筆立就雅意興賢作招隱歌猗蘭操以見志

劉基字伯溫青田人負命世才博通天文地理陰符家言元至順間以明經登進士第累仕皆投劾去入明以佐命功官至御史中丞封誠意伯正德中追謚文成詩文皆手自編定在元季作者名覆瓿集明初作者名犂耨公集

高啓字季迪長洲人至正末隱吳淞江之青邱自號青邱子洪武初召入都命纂修元史尋入內府教功臣子弟授翰林院國史編修官三年七月擢戶部侍郎力辭賜白金放還詞一卷名扣舷集

楊基字孟載其先本嘉州人以大父仕江左生於吳中九歲背誦六經著書十萬餘言名曰論鑒洪武二年授滎陽知縣謫居鍾離久之用薦為江西行省幕官坐省臣得罪落職六年起奉使湖南廣右召授兵部員外郎

出為山西按察使基少負詩名與高啓張羽徐賁為友
時號吳中四傑有蒼菴集十二卷

陶安字主敬太平人明祖渡江安率父老奉迎留置幕
府歷左司郎中出知黃州降桐城令移知饒州仍改黃
州尋召為翰林院學士御製門帖賜之曰國朝謀略無
雙士翰苑文章第一家洪武元年擢江西行中書參知
政事有學士集

王行字止仲長洲人髫時從其父為閭門南市人市藥

主人翁授以魯論一夕成誦乃令徧閱所藏書未久辭去授徒於城北洪武初郡庠延為訓導晚年隱居石湖好談兵法喜釋老工詩畫洪武二十六年游京師居涼國公西塾竟同坐法

解縉字大紳一字縉紳吉水人洪武二十六年進士授中書庶吉士改御史建文時待詔翰林永樂初為侍讀學士直文淵閣進翰林學士出為廣西參議改交趾縉生而穎異下筆輒數萬言未嘗起藁有春雨集

林鴻字子羽福清人洪武初以薦授將樂儒學訓導居七年拜膳部員外郎召試龍池春曉孤鴈二詩名動京師自免歸有集

胡儼字若思南昌人洪武末會試乙科授華亭教諭永樂初擢翰林簡討直內閣進國子監祭酒兼侍講掌翰林院洪熙元年加太子賓客致仕

王達字達善無錫人洪武中舉明經除國子監助教永樂中擢翰林編修遷侍讀學士有盛名與解縉王偁等

號東南五才子所傳有耐軒天遊二稿

王璉字汝器長洲人洪武壬子以會試舉子簡授編修
肄業文華堂終吏部主事

瞿佑字宗吉錢塘人洪武中以薦歷仁和臨安宜陽訓
導遷周府右長史

馬洪字浩瀾仁和人善吟詩詞調尤工有花影集

莫璠字仲璵錢塘人隱居不仕有西湖十景詞盛傳於

世

晏璧江西人宣德時擢吳草廬三禮改注

徐有貞初名理字元玉吳縣人宣德癸丑進士選翰林院庶吉士授編修歷春坊諭德改僉都御史治河張秋天順改元以迎復功拜華蓋殿大學士兵部尚書掌內閣事封武功伯

商輅字弘載淳安人正統乙丑進士自鄉試會試以至殿試皆第一授翰林院修撰累官至禮部尚書入東閣謚文毅有文毅集

湯公讓其先鳳陽人東甌王和之曾孫隸應天府學為
諸生尋棄之巡撫周忱薦其有文武才授錦衣衛百戶
歷官至延綏參將

李東陽字賓之茶陵人以戌籍居京師四歲舉神童八
歲入京學天順八年登進士選翰林院庶吉士授編修
歷官至吏部尚書華蓋殿大學士謚文正有懷麓堂集
及續集南行東祀諸集

姚綬字公綬嘉善人天順末進士拜監察御史成化初

知永寧府解官作室曰丹邱自稱丹邱先生

周用字行之吳江人弘治壬戌進士授行人遷南京工
科給事中歷仕至吏部尚書謚恭肅

吳寬字原博長洲人成化八年會試廷試俱第一入翰
林累遷至掌詹禮部尚書司內閣誥敕謚文定有匏庵
集

吳洪字禹疇吳江人成化壬辰進士由刑部主事歷官
至刑部尚書

趙寬字粟夫吳江人成化辛丑進士第一歷官刑部郎中出為浙江提學副使廣東按察使有半江集

桑悅字民懌常熟人讀書一過輒焚棄年十九領成化乙酉鄉薦三赴會試得乙科除泰和訓導遷長沙通判調柳州外艱歸遂不出嘗作兩都賦有集

沈周字啓南長洲人受經學於陳寬景泰間舉賢良筮得遜之九五遂不應耕讀於相城里工詩畫有石田先生集

韓守益

史鑑字明古吳江人博學好古隱居邑之西村有西村集

文徵明初名璧以字行更字徵仲長洲人父林為溫州守徵明受文法於吳寬受書法於李應禎受畫法於沈周以諸生歲貢入京授翰林院待詔尋告歸

顧璘字華玉吳縣人徙居金陵弘治丙辰進士歷官至南京刑部尚書璘少負才名與陳沂王韋同號金陵三

俊有息園浮湘憑几歸田諸集

邊貢字廷實歷城人弘治丙辰進士授太常博士累官
至南京戶部尚書有華泉集八卷即弘治七子之一
王廷相字子衡儀封人弘治壬戌進士選庶吉士改授
兵科給事中再謫再起歷官至兵部尚書兼都察院左
都御史有家藏集行世

陸深字子淵上海人弘治乙丑進士由庶吉士授編修
陞國子監祭酒左遷延平府同知歷副使布政使召還

以太常卿兼侍讀學士進詹事府詹事謚文裕有詩文集百卷及河汾燕閒錄玉堂漫筆傳於世

陸揖字思豫深之子有兼葭堂集

吳山字靜之吳江人大司寇洪之子正德戊辰進士授刑部主事歷任南贛河南四川巡撫入為刑部尚書謚忠襄

楊慎字用修新都人大學士廷和之子七歲作擬古戰場文正德辛未廷試第一授翰林院修撰以議禮謫戍

滇南著述最富詩文集之外凡百餘種

張紱字世文高郵人正德癸酉舉人選武昌府通判遷知光州著詩餘圖譜詞家奉為指南有南湖集四卷

夏言字公謹貴溪人正德丁丑進士授行人歷吏科都給事中以議禮稱旨改翰林院侍讀入直內閣歷官至吏部尚書華蓋殿大學士謚文愍有元相桂翁詞及鷗園新曲行世

徐階字子升華亭人嘉靖癸未進士廷試第三人授編

修歷官禮部尚書建極殿大學士謚文貞

王慎中字道思晉江人嘉靖丙戌進士授戶部主事改禮部又改吏部歷驗封郎中謫為常州府通判稍遷南戶禮二部終河南左參政

黃正色字斗南無錫人嘉靖己丑進士歷知仁和香山南海三縣擢為御史後官至大理卿有遼陽藁

吳子孝字純叔長洲人大學士一鵬之子嘉靖己丑進士選庶吉士改工部主事歷光祿寺丞遷湖廣參議提

督太和山有海峰詞集

駱文盛字質甫武康人嘉靖乙未進士由庶吉士授翰林院編修尋告歸所居在餘英溪之下因自號兩溪李攀龍字子鱗歷城人嘉靖甲辰進士授刑部廣東司主事歷郎中出知順德府擢陝西提學副使移疾歸用何景明例特予告凡十年起浙江副使遷參政拜河南按察使母喪歸卒有滄溟集三十卷

王世貞字元美太倉人嘉靖丁未進士除刑部主事歷

郎中出為青州兵備副使以家難解官歸隆慶初起補
大名兵備遷浙江參政山西按察使入為太僕卿以右
副都御史撫治鄖陽遷南大理卿應天府尹乞歸起南
刑兵兩部侍郎拜刑部尚書乞歸卒與李攀龍輩號後
七子有弇州山人四部正續稿百餘卷

鄔仁卿字汝元丹徒人嘉靖壬子舉人知湘潭縣有駢
語集

吳邦楨字子寧吳江人大司寇山之子嘉靖癸丑進士

授刑部主事累遷至太僕卿

于永號勵庵金壇人侍郎湛之子嘉靖乙卯舉人

王世懋字敬美世貞之弟嘉靖乙未進士除南京禮部主事改北禮部主事遷司寶丞出江西參議陝西福建提學副使終南京太常寺少卿有奉常集

王錫爵字元馭太倉人嘉靖壬戌進士第一廷試第二授翰林院編修歷官禮部尚書建極殿大學士謚文肅有文肅集

欽定四庫全書



御選歷代詩餘

卷一百十

十

莫是龍字雲卿以字行更字廷韓華亭人以諸生貢入太學

陸祖允

徐渭字文清更字文長山陰人嘉靖中少保胡宗憲督兵浙江以諸生延入幕府掌書記有闕編櫻桃館諸集陳淳字道復吳郡姚湖人自號白陽山人

林章字初文福清人萬歷癸酉舉人僑寓金陵屢上書言時事卒於獄

趙南星字夢白高邑人萬曆甲戌進士選汝寧府推官
遷戶部郎歷吏部考功郎中削籍里居三十年天啓初
以列卿起廢拜吏部尚書坐忤逆奄遣戍大同卒謚忠
毅有集

馮琦字用韞臨朐人萬曆丁丑進士選庶吉士授翰林
院編修歷官至禮部尚書謚文敏有北海集

屠隆字長卿鄞縣人萬曆丁丑進士除潁上知縣調青
浦陞禮部主客主事歷儀制郎中有由拳白榆采真南

遊諸集

湯顯祖字義仍臨川人萬厯癸未進士授南京太常博士遷南禮部郎疏劾政府謫廣東徐聞典史稍遷知遂昌縣有玉茗堂集

袁黃字坤儀吳江人萬厯丙戌進士官至兵部職方司主事

焦竑字弱侯金陵人萬厯己丑進士廷試第一官翰林院修撰

張琨

王肯堂字字泰金壇人萬厯己丑進士由庶吉士補外任歷官福建布政司參政

費元祿字無學鉛山人南太僕卿堯年之子有甲秀集
儲昌祚字肩宇宜興人萬厯己丑進士歷官四川按察司僉事

儲懋端昌祚之子

王衡字辰玉太倉人大學士錫爵之子萬厯辛丑進士

廷試第二授翰林院編修有緱山集

俞彥字仲茅金陵人萬厯辛丑進士歷官光祿寺少卿
王坊字元表華亭人萬厯壬子舉人歷官河南信陽州
知州

俞琬綸字君宣吳縣人萬厯癸丑進士授西安知縣有
自娛集

錢繼登字龍門嘉善人萬厯丙辰進士知饒州府有壑
專堂集

魏浣初字仲雪常熟人萬厯丙辰進士歷官廣東提學
參政有四如山樓集

吳宗達字青門武進人萬厯甲辰進士廷試一甲第三
名歷官至大學士謚文端

陳繼儒字仲醇華亭人隱居小崑山自號睢公

吳正志字之矩有雲起樓集

葛一龍字震甫吳之洞庭人官雲南布政司理問

范汭字東生烏程人祭酒應期之姪太學生輯全唐詩

千餘卷有詩集四卷

吳鼎芳字凝父世居吳之西洞庭與烏程范汭有披襟
倡和集後薙染為僧號庵覽

李鄂

施紹莘字子野嘉興人有花影集

張逸字泰菴

陳子龍字臥子青浦人崇禎丁丑進士歷官兵科給事
中有湘真閣江離檻詞行世

夏允彝字彞仲華亭人崇禎丁丑進士官至吏部考功司主事

李叔房字孟蓮

錢繼章字爾斐嘉善人繼登之弟崇禎丙子舉人有谿嘿山房集菊農詞

吳易字日生吳江人太僕卿邦禎之孫崇禎癸未進士授兵部職方司主事有東湖倡和詩詞二卷

王泰際字內三嘉定人崇禎癸未進士有冰抱集二十

卷

沈泓字臨秋

沈友夔初名龍華亭人崇禎癸未進士有雪初堂集

沈麇字天鹿華亭人

沈懋德字雲嵩嘉善人所著有坊表錄及湖目齋詩詞行世

陸釋麟字瞿彌有集

于玉班字清卿金壇人孝廉永之孫光祿少卿孔兼之

子

于玉珩字佩卿玉班之弟

馮鼎位字素人松江人崇禎戊辰拔貢授翰林院待詔
喻綜

王彥泓字次回金壇人都御史樵之孫以歲貢授華亭
訓導

錢應金字星白嘉興人有古堂集

夏復字存古華亭人吏部主事允彝之子有玉樊堂藁

胡偕行字與行徽州人

董斯張字遐周歸安人大宗伯份之孫撰廣博物志四十卷

程醇字墨仙休寧人有石交堂詞

吳充字魯于武進人萬厯庚子舉人

高濂字深甫

顧同應字仲從華亭人

張草字石陽有繡香集

陳翼飛字元朋

卓人月字珂月仁和人
有蕊淵集

于儒穎字發仲金壇人
光祿少卿孔兼之孫

沈自炳字君晦吳江人
副使琬之子

顧士林字文叔嘉興人

錢繼振字爾玉嘉善人

錢光繡字聖月

沈宗塢字以冲仁和人
崇禎癸未進士終行人

沈宗堦字旨庵

錢芬字仲芳

沈鍾鶴字同庵

顧孔昭

沈士鑛字寶臣

沈士銑字聲令

顧諫字廷直嘉興人

朱諫

顧志字存英有暉吉堂集

張大烈字言冲錢塘人有詩餘類函

唐世瀚字宗之

李伊玉

吳楨字永錫

朱灝字宗遠松江人

薛廷寵

周世臣字穎侯

孫茂芝字若英

裘昌令字梅倩有書仙閣詞

褚附鳳字梧岡

李福謙字子虛嘉興人

馮盛世字濟之

戈止字永清

失名

夢菴

方外

釋涵初

閨媛

朱盛藻字瓊蕤黃州楚宗女嘗作灌春逸尚序

端淑卿當塗人教諭廷弼之女歸芮氏有綠牕詩藁

王鳳嫺字瑞卿號文如子華亭人進士張本嘉妻嫠居

教子與二女引元引慶自相倡和有貫珠集雙燕遺音

行世

張引元字文妹又字蕙如華亭張本嘉之女適楊安世
黃氏狀元楊慎妻

張紅橋閩縣人居於紅橋之西因自號紅橋後歸福清
林鴻

孟淑卿蘇州人訓導澄之女自號荆山居士

陸卿子長洲人尚寶卿師道女太倉趙宦光妻有雲臥
閣考槃諸集

項蘭貞字孟畹秀水黃卯錫妻有裁雲月露二草陸卿

子為之序

沈宜修字宛君吳江人山東副使琬之女工部郎中葉紹袁妻有鸚吹集

沈靜專字曼君宜修之妹歸吳氏所著詩詞名適適草
葉紈紈字昭齊紹袁長女歸同邑袁氏藁名愁言

葉小紈字蕙綢紹袁次女適同邑沈永楨

葉小鸞字瓊章紹袁幼女遺藁名返生香

張倩倩吳江人適同邑沈自微

徐媛

武氏三水人太僕少卿文翔鳳妻

劉氏楚人

錢氏

郭璿字素汝長洲人適埭川顧氏

顧若璞字知和錢塘人適王氏有臥月軒集

商景蘭字媚生會稽人應天巡撫祁彪佳妻

周蘭秀吳江人適平湖孫氏

韓智珙湖州人狀元韓敬之女歸金壇于鑾

謝小湑字中李有集

吳朏號冰蟾子華亭人適曹氏

陳契字无垢宜興人有茹蕙集

妓女

王微字修微廣陵妓自號草衣道人有樾館詩數卷

楊宛字宛叔金陵妓有集

馬瓊瓊

御選歷代詩餘卷一百十

欽定四庫全書

御選歷代詩餘卷一百十一

司經局洗馬掌局事兼翰林院修撰加二級臣王奕清奉

音校刊

詞話唐一

舜典曰詩言志歌永言聲依永律和聲詩序曰在心為志發言為詩情動於中而形於言言之不足故嗟歎之嗟歎之不足故詠歌之詠歌之不足故不知手之舞之

足之蹈之樂記曰詩言其志也歌詠其聲也舞動其容也三者本於心而樂器從之故有心則有詩有聲則有律先定其音節然後製詞亦依永和聲之意也今又分詩與樂府作兩科曰古詩曰樂府謂詩之可歌者也而古樂府以為詩之流而詞皆就音節以為名漢時雅鄭雜用而鄭為多魏平荊州得漢雅樂古曲音調存者有四曰鹿鳴騶虞伐檀文王而李延年之徒以歌被寵復改易音節止存鹿鳴一曲晉初亦除之又考漢時短簫

饒歌樂曲三國所存者有朱鷺艾如張上之回戰城南
將進酒之類凡二十二曲晉興又盡改之獨玄雲釣竿
二曲而已自晉以來五季新曲頗衆隋初盡歸清樂唐
景龍後曲詞猶存如白雪公莫舞巴渝白苧子夜團扇
懊懽莫愁楊叛兒烏夜啼玉樹後庭花六十三曲唐中
葉有聲有詞者三十有七有聲無詞者止七曲唐歌曲
比前代為多其見於今者十之三四耳

碧雞
漫志

詞起於唐人而六代已濫觴矣梁武帝有江南弄陳後

主有玉樹後庭花隋煬帝有夜飲朝眠曲豈獨五代之
主蜀之王衍孟昶南唐之李璟李煜吳越之錢俶以工
小詞為能文哉王衍之月明如水浸宮殿有酒不醉真
癡人李玉簫愛賞之元人用為傳奇孟昶之冰肌玉骨
清無汗東坡復衍足其句錢俶之金鳳欲飛遭掣搦情
脉脉行即玉樓雲雨隔為藝祖歎賞惜無全篇而亦流

遞於後矣

曲洧
舊聞

隋樂工王令言妙達音律時煬帝將征遼令言之子彈

琵琶作安公子曲令言驚問那得有此對曰宮中新翻

曲也調在太簇角

通典

玉臺新詠載烏夜啼徐陵云繡帳羅幃燈影獨一夜千年猶不足惟憎無賴汝南雞天河未落已爭啼王建云章華宮人夜上樓君王望月西山頭夜深宮殿門不鎖白露滿山山葉墮一首轉韻平仄各叶此商調曲也皇甫松竹枝祖之

楊慎

填詞必溯六朝者亦昔人探河窮源之意如梁武帝江

南弄云衆花雜色滿上林舒芳耀彩垂輕陰連手蹈蹀
舞春心舞春心臨歲腴中人望獨踟躕梁僧法雲三洲
歌一解云三洲斷江口水從窈窕河旁流啼將別共來
長相思二解云三洲斷江口水從窈窕河旁流歡將樂
共來長相思梁臣徐勉迎客曲云絲管列舞曲陳含羞
未奏待佳賓羅絲管陳舞席歛袖嘿脣迎上客送客曲
云袖繽紛聲委咽歌曲未終高駕別爵無筭景已流空
紆長袖客不留隋煬帝夜飲朝眠曲云憶睡時待來剛

不來卸妝仍索伴解佩更相催博山思結夢沉水未成
灰憶起時投籤初報曉被惹香黛殘枕隱金釵裊笑動
上林中除却司晨鳥王獻迎神歌云蒲草頭花柳葉裙
蒲葵樹下舞蠻雲引願望江遙滴淚白蘋風起水生紋
送神歌云振振山響答琵琶酒濕青莎肉飼鴉樹葉無
聲神去後紙錢飛出木棉花此六代風華靡麗之語後
來詞家之所本也略輯於此

楊慎

沈約亦有六憶詩其三云憶眠時人眠獨未眠解羅不

待勸就枕更須牽復恐旁人見嬌羞在燭前已開煬帝
之先矣

詞苑

唐時古意猶未失竹枝浪淘沙拋毬樂楊柳枝乃詩中
絕句而定為歌曲故李白清平調皆絕句元白諸詩多
為知音者協律白居易守杭元稹贈詩云休遣玲瓏唱
我詩我詩多是別君辭自注云樂人高玲瓏能歌余數
十詩又白居易自有詩云席上爭飛使君酒歌中羣唱
舍人詩又元稹見人歌韓舍人新律詩戲贈云輕新便

妓唱凝妙入僧禪沈亞之云故人李賀善撰南北朝樂府多怨鬱悽豔之句誠能蓋古排今使為詞者莫能偶矣唐史稱李賀樂章數十篇諸工皆合之管絃又稱李益詩每一篇成樂工慕名者爭以賂取之被諸聲歌供奉天子舊史亦稱武元衡工五言詩好事者傳之往往見於樂部開元中王昌齡高適王之渙旗亭畫壁伶官招妓聚宴以此知唐之伶妓以當時名士詩詞入歌曲皆常事也

碧雞漫志

梁樂府有夜夜曲或名昔昔鹽昔即夜也鹽亦曲之別
名張祜詩村俗猶吹阿濫堆賀鑄詞塞管孤吹新阿濫
又戴式之有烏鹽角行元人月泉吟社詩山歌聒耳烏
鹽角村酒柔情玉練槌阿濫堆烏鹽角皆曲名也李郢
詩謝公留賞山公醉知入笙歌阿那朋劉禹錫竹枝詞
今朝北客思歸去回入紇那披綠羅阿那紇那亦當時
曲名李詩言變梵唄為豔歌劉詞言變南調為北曲也

唐詞紀為郭茂倩所輯楊璠董御多收偽詞以廣之有
以其名同而濫收之者今取劉禹錫紇那曲云踏曲興
無窮調同詞不同願郎千萬壽長作主人翁按詞品阿
那紇那皆當時曲名劉禹錫言變南調為北曲蓋隨方
音而轉也劉采春羅噴曲云莫作商人婦金釵當卜錢
朝朝江口望錯認幾人船按曲有三解一名望夫歌取
其一以存調無名氏一片子云柳色青山映梨花雪鳥
藏綠牕桃李下閒坐歎春芳按教坊記有此名樂府解

題所不詳者更有琴曲名千金意始分前後段起句三字一音如音音音三字起句後接心心心三字起句而下俱指法未能格之也

古今
詞話

今以五七言之別見者彙較之如何滿子已收六言六句矣茲考薛逢之何滿子云繫馬宮槐老持杯店菊黃故交今不見流恨滿山光如三臺令已收六言四句矣茲考李後主之三臺令云不寐倦長更披衣出戶行月寒秋竹冷風切夜窓聲如楊柳枝已收七言四句矣茲

考李商隱之楊柳枝云畫屏繡步障物物自成雙如何
湖上望只是見鴛鴦如醉公子已收無名氏之五言八
句矣茲考無名氏之醉公子云昨日春園飲今朝倒接
離誰人扶上馬不省下樓時如長命女已收長短句矣
茲考無名氏之長命女云雲送關西兩風傳渭北秋孤
燈然客夢寒杵搗鄉愁如烏夜啼已收長短句矣茲考
聶夷中之烏夜啼云衆鳥各歸枝烏爾不棲還應知
妾恨故向綠牕啼如長相思已收琴調之長短句矣茲

考張繼之仄韻長相思云遼陽望河縣白首無由見海上珊瑚枝年年寄春燕又令狐楚之平韻長相思云君行登隴上妾夢在關中玉筍千行落銀牀一夕空如江南春旣列長短句矣茲考劉禹錫之江南春云新妝宜面下朱樓深鎖春光一院愁行到中庭數花朵蜻蜓飛上玉搔頭如步虛詞已列長短句之雙調矣茲考陳羽之步虛詞云樓閣層層阿母家崑崙山頂駐紅霞笙歌往見穆天子相引笑看琪樹花如漁歌子已列長短句

之單調雙調矣茲考李夢符之漁父詞二首云村市鐘
聲渡遠灘半輪殘月落前山徐徐撥棹却歸去浪疊朝
霞碎錦翻漁弟漁兄喜到來婆官賽却坐江隈椰榆杓
子溜杯酒爛煮鱸魚滿盞堆如鳳歸雲已列林鍾商之
長調矣茲考滕潛之鳳歸雲二首云金井闌邊見羽儀
梧桐樹上宿寒枝五陵公子憐文彩畫與佳人刺繡衣
飲啄蓬山最上頭和煙飛下禁城秋曾將弄玉歸雲去
金翻斜翻十二樓他如離別難金縷曲水調歌白苧各

有七絕雜以虛聲亦多可歌者後之集譜者無以詩句

而亂詞調也

古今詞話

清商曲有采蓮子即江南弄中采蓮曲如李白耶溪采蓮女見客棹歌回笑入荷花裏佯羞不出來劉方平落日晴江曲荆歌豔楚腰采蓮從小慣十五即乘潮又王昌齡亂入池中看不見聞歌始覺有人來張潮賴逢鄰女曾相識並著蓮舟不畏風殊有風致然必以皇甫松孫光憲之排調有襯字者為詞體

樂府解題

無名氏回紇曲云陰山瀚海信難通幽閨少婦罷裁縫
緬想邊庭征戰苦誰能對鏡冶愁容久戍人將老須臾
變作白頭翁長歌之哀過於痛哭必陳隋初唐之作也
馮延巳別名拋毬樂莫思歸其所製見陽春集

詞品

岑參六州歌頭云西去輪臺萬里餘也知音信日應疎
隴山鸚鵡能言語為報家人數寄書註云六州伊渭梁
氏甘涼也王維伊州歌云秋風明月獨離居蕩子從軍
十載餘征人去日殷勤囑歸雁來時好寄書張仲素渭

州詞云亭亭孤月照行舟寂寂長江萬里流鄉國不知
何處是雲山漫漫使人愁王之渙梁州歌云黃河遠上
白雲間一片孤城萬仞山羌笛何須怨楊柳春風不度
玉門關張祐氏州第一云十指纖纖玉筍紅雁行輕度
翠絃中分明自說長城苦水闊雲寒一夜風符載甘州
歌云月裏嫦娥不畫眉只將雲霧作羅衣不知夢逐青
鸞去猶把花枝蓋面歸無名氏涼州歌云一去遼陽繫
夢魂忽傳征騎到中門紗牕不肯施紅粉圖遣蕭郎問

淚痕此皆商調曲也樂府所收六州歌頭則一百四十

三字長短句之三疊者

樂府
衍義

五行之聲所司為正所歌為傍所斜為偏所下為側正
宮之調正犯黃鐘宮傍犯越調偏犯中呂宮側犯越角
之類樂府諸曲自昔不用犯聲唐自天后末年劔器入
渾脫始為犯聲明皇時樂人孫處秀善吹笛好作犯聲

亦鄭衛之變也

陳暘
樂書

唐時羯鼓錄無有能傳其法者開元帝最為妙絕宋璟

李皋裴冕亦精其理至宋元祐中邠州一老猶能之有

大合禪滴滴泉曲

太平樂府

樂部中有促拍催酒謂之三臺唐士云蔡邕自御史累
遷尚書不數日間歷徧三臺樂工以邕洞曉音律故製
詞以悅之又始作樂必曰絲抹將來蓋絲竹在上鐘鼓
在下絲以起之樂乃作亦唐以來如是

珊瑚廟詩話

宋沆為太樂令知音近代無比太常久亡徵調沆乃考

鐘律而得之

唐國史補

唐永徽中王方言於河灘拾得小樹栽之及長乃林檎也進於高宗以為朱柰又名五色林檎教坊以為曲名

洽聞記

景雲初設宴於桃花園羣臣畢集學士李嶠等各獻桃花詩令宮女歌之辭既清婉歌復妙絕獻詩者舞蹈稱萬歲勅太常簡二十篇入樂府號曰桃花行

武平一
文館記

先天初明皇御安福門觀燈令朝士能文者為踏歌聲

調入雲

輦下歲時記

李白草堂集白蜀人草堂在蜀懷故國也菩薩蠻憶秦
娥二首為百代詞曲之祖

鄭樵
通志

開元中李白供奉翰林時禁中木芍藥盛開明皇乘照
夜白貴妃以步輦從選梨園子弟度曲李龜年捧檀板
押衆樂前欲歌明皇曰賞名花對妃子焉用舊詞遂命
龜年持金花箋宣賜李白立進清平調三章白宿醒未
解援筆而就太真持頗黎七寶杯酌西涼葡萄酒明皇
親調玉笛以倚曲每曲徧將換則遲其聲以媚之太真

飲罷歛繡巾重拜自此顧李白異於他學士

松窓撫
異錄

李白於便殿對帝誤詞時天寒筆凍莫能書字帝敕宮

嬪十人侍白左右各執牙筆呵之其受聖眷如此

開元
遺事

楊用修所載太白清平樂二闕識者謂非太白作以其
卑淺也按太白清平調本三絕句而已不應復有詞也

王世貞

四部稿

河漢女玉鍊顏雲軒往往在人間九霄有路去無跡
裊裊香風生珮環此太白桂殿秋詞也得於石刻而無腔

劉無言倚其聲歌之音極清雅

能改齋漫錄

仙女下董雙成漢殿夜涼吹玉笙曲終却從仙官去萬
戶千門惟月明李太白詞也得於石刻而無其腔劉無
言自倚其聲歌之東臯雜錄又以為范德孺謫均州偶
遊武當山石室極深處有題此曲於崖上未知孰是

詞苑

平林漠漠煙如織寒山一帶傷心碧暝色入高樓有人
樓上愁玉階空佇立宿鳥歸飛急何處是歸程長亭更
短亭此詞寫於鼎州滄水驛不知何人所作魏道輔泰

見而愛之後至長沙得古風集於曾子宣內翰家乃知

李白所誤

湘山野錄

開元時南詔入貢危髻金冠瓔珞被體號菩薩蠻因以製曲楊慎改蠻為髻以戒經華髻被首為據殊失詳考

胡應麟

筆叢

唐大中初女蠻國貢雙龍犀明霞錦其人危髻金冠瓔珞被體當時號為菩薩蠻優者作女王曲文士往往譜

為詞

杜陽雜編

憶秦娥商調曲也鳳樓春即其遺意李白之簫聲咽用仄韻孫夫人之花深深用平韻張宗瑞復立新名曰碧

雲深

唐詞紀

唐詞載李德裕步虛詞即雙調搗練子唐詞本無換頭搗練子本無雙調近刻列為李白桂殿秋二首李集之考覈者多矣不聞菩薩蠻憶秦娥而外別有桂殿秋也吳虎臣得於石刻而無其腔劉無言倚其聲歌之其說亦未足信劉禹錫作瀟湘神起處疊三字一句亦即搗

練子但為迎神送神之詞耳

古今
詞話

教坊記曰開元十一年初製聖壽樂以歌舞之所司先進曲名以墨點者舞舞有曲教坊惟得舞伊州五天重來疊不離此兩曲餘悉讓內家也內家舞曲有二垂手羅迴波樂蘭陵王春鶯囀半社渠借席烏夜啼之屬謂之軟舞阿遼曲柘枝黃鸞拂林大渭州達摩之屬謂之健舞此崔令欽所編曲名三百餘調始此

古今
詞話

明皇嘗坐朝以手指上下按其腹朝退高力士進曰陛

下向來數以手指按腹豈非聖體小有不安耶明皇曰
非也吾昨夜夢遊月宮諸仙娛以上清之樂寥亮清越
非人間所聞酣醉久之合奏諸樂以送吾歸其曲悽楚
動人杳杳在耳吾回以玉笛尋之盡得之矣坐朝之際
慮忽遺忘故懷玉笛於衣中時以手指上下尋按非有
不安力士再拜賀曰非常之事也願陛下為臣一奏之
其聲寥寥然不可名言力士又再拜且請其名明皇笑
曰此曲名紫雲迴遂載於樂章

鄭榮傳
信錄

昔昔鹽阿濫堆烏鹽角阿那朋之類皆歌曲名也自昔
昔鹽排律外餘多七言絕句有其名而無其調隋煬帝
李白調始生矣然望江南憶秦娥則以詞起調者也菩
薩蠻則以詞按調者也

藝苑
危言

驪山多飛鳥名阿濫堆明皇御玉笛采其聲翻為曲子
當時左右皆傳唱之一作鷓鴣堆

中朝
故事

開元中大酺於勤政樓觀者喧聚莫辨魚龍百戲之音
高力士請命宮人張永新出歌可以止喧永新出奏曼

聲廣場寂寂若無一人大酺之曲名始此矣

太平樂府

明皇諳音律善度曲嘗臨軒縱擊梨一曲曰春光好方
奏時桃李俱發又製一曲曰秋風高奏之風雨颭然帝
曰此事不喚我作天公可乎詞俱失傳惟好時光一闋
云寶髻偏宜宮樣蓮臉嫩體猶香眉黛不須張敞畫天
教入鬢長莫倚傾城貌嫁取箇有情郎彼此當年少莫
負好時光

開元軼事

荔枝香出唐書貴妃生日命小部奏新曲未有名適進

荔枝即以名曲解語花明皇稱貴妃語出天寶遺事念

奴嬌明皇宮人念奴也

詞品

樂府聲詩並著最盛於唐開元天寶間有李八郎者以
能歌擅名天下時新及第進士開宴曲江榜中有名士
先召李易服隱姓名與同至宴所曰表弟願與座末衆
皆不顧旣而酒行樂作歌者曹元謙奏念奴嬌衆皆咨
嗟稱賞名士忽指李曰請表弟歌衆皆哂或有怒者及
轉喉發聲一曲未終衆皆泣下羅拜曰此李八郎也

李清照

明皇幸蜀霖雨彌旬棧道中聞鈴聲明皇悼念貴妃為

製雨霖鈴曲

太真外傳

楊太真亦有一詞贈善舞張雲容者詞云羅袖動香香
不已紅蕖裊裊秋煙裏輕雲嶺上乍搖風嫩柳池邊初
拂水此阿那曲也

詞統

江采蘋九歲誦二南詩開元中選侍明皇見寵所居悉
植梅花故號梅妃為太真逼遷上陽明皇於花萼樓念
之會夾使貢珠命封一斛賜妃妃謝以詩云柳葉雙眉

久不描殘妝和淚污紅綃長門盡日無梳洗何必珍珠
慰寂寥明皇以新聲度曲曰一斛珠

梅妃傳

王士源襄陽集序云孟浩然骨貌清淑風神散朗文不
按古師心獨妙其春詞有云青樓曉日珠簾映紅粉春
妝寶鏡催已厭交歡憐枕席相將遊戲繞池臺坐時衣
帶縈纖草行即裙裾埽落梅更道明朝不當作私邀共

關管絃來論者以為有詩詞之別

唐詩解

王維詩名盛於開元天寶間與弟縉宦遊兩都凡諸王

駙馬豪右貴勢之門無不拂席迎之寧王薛王待之如師友人有得奏樂圖不知其名維視之曰霓裳第三疊第一拍也好事集樂工按之一一無差咸服其精鑒

唐詩

紀事

開元中詩人王昌齡高適王之渙齊名時風塵未偶而遊處略同一日天寒微雪三詩人共詣旗亭貰酒小飲忽有梨園伶官數人登樓會讌三詩人因避席隈映擁爐火以觀焉俄有妙妓數輩尋續而至奢華豔曳都冶

頗極旋即奏樂皆當時名部也昌齡等私相約曰我輩各有詩名無從自定其甲乙今者可以密觀諸伶所謳若詩入歌詞之多者為優矣俄而一伶拊節而唱乃曰寒雨連江夜入吳平明送客楚山孤洛陽親友如相問一片冰心在玉壺昌齡則引手畫壁曰一絕句又一伶謳曰開篋淚霑臆見君前日晝夜臺何寂寞猶是子雲居適則引手畫壁曰一絕句尋又一伶謳曰奉帚平明金殿開強將團扇共徘徊玉顏不及寒鴉色猶帶昭陽

日影來昌齡又引手畫壁曰二絕句之渙自以得名已久意頗不平謂諸人曰此輩皆潦倒樂官所唱皆巴人下里之詞耳豈陽春白雪之曲俗物敢近哉因指諸伎中最佳者待此子所唱如非我詩即終身不敢與子爭衡矣脫是我詩子等須當列拜牀下以師事我因歡笑而俟之須臾次至雙鬢發聲則曰黃河遠上白雲間一片孤城萬仞山羌笛何須怨楊柳春風不度玉門關之渙即揶揄二子曰田舍奴我豈妄哉因大諧笑諸伶不

喻其故皆起詣曰不知諸郎君何此歡噓昌齡等因話
其事諸伶競拜曰俗人不識神仙乞降清重俯就筵席
三子從之飲醉竟日

唐詩
紀事

張志和自稱煙波釣徒嘗謁顏真卿於湖州以舴艋敝
請更之願為浮家泛宅往來苕霅間作漁歌子詞曰西
塞山前白鷺飛桃花流水鱖魚肥青箬笠綠蓑衣斜風

細雨不須歸

樂府
紀聞

湖州磁湖鎮道士磯即張志和所謂西塞山前白鷺飛

也

西吳記

武昌府大冶縣東九十里為道士汭即西塞山塞音澀
水經云壁立千仞東北對黃公九磯故名西塞橫截江
流旋渦沸激舟人過之每為失色張耒詩云已逢嫵媚
散花峽不怕危亡道士磯遂以為即志和所遊西塞山
未知孰是

詞苑

志和性高邁自為漁歌便畫之甚有逸思

名畫記

張松齡以漁歌子招其弟志和曰樂在風波釣是閒草

堂松桂已勝攀太湖水洞庭山風狂浪急且須還後家

鶯脰湖旁仙去吳人為建望仙亭

羅湖
野錄

東坡云元真子漁父詞極清麗恨其曲度不傳加數語
以浣溪紗歌云西塞山邊白鷺飛散花洲外片帆微桃
花流水鰕魚肥自庇一身青箬笠相隨到處綠蓑衣斜
風細雨不須歸山谷見之擊節稱賞且云惜乎散花與
桃花字重疊又漁舟少有使帆者乃為浣溪紗云新婦
磯邊看黛愁女兒浦口眼波秋驚魚錯認月沉鉤青箬

笠前無限事綠蓑衣底一時休斜風細雨轉船頭東坡
云魯直此詞清新婉麗以水光山色替却玉肌花貌真
得漁父家風然才出新婦磯便入女兒浦此漁父母乃
太瀾浪乎山谷晚年亦悔前作之未工因表弟李如篴
言漁父詞以鷓鴣天歌之甚協律恨語少聲多因以憲
宗畫像求元真子文章及元真之兄松齡勸歸之意足
前後數句云西塞山前白鷺飛桃花流水鱖魚肥朝廷
尚覓元真子何處而今更有詩青箬笠綠蓑衣斜風細

兩不須歸人間欲避風波險一日風波十二時東坡笑
曰魯直乃欲平地起風波也徐師川作浣溪紗鷓鴣天
各二闋蓋因坡谷異同而作浣溪紗云西塞山前白鷺
飛桃花流水鱖魚肥一波才動萬波隨黃帽豈如青箬
笠羊裘何似綠蓑衣斜風細雨不須歸又云新婦磯邊
秋月明女兒浦口晚潮平沙頭鷺宿戲魚驚青箬笠前
明此事綠蓑衣底度平生斜風細雨小舟輕鷓鴣天云
西塞山前白鷺飛桃花流水鱖魚肥朝廷若覓元真子

長在晴江理釣絲青簑笠綠蓑衣斜風細雨不須歸浮
雲萬里煙波客惟有滄浪孺子知其二云七澤三湖碧
草連洞庭江漢水如天朝廷若覓元真子不在雲邊在
酒邊明月棹夕陽船鰕魚恰似鏡中懸絲綸釣餌都收
却八字山前聽雨眠

詞苑


元結於大厯中為道州刺史以軍事詣都還洛日春水
漲溢不得前作歎乃曲數首使舟子歌之以取適於道

路云

古今
詞話

漁翁夜傍西巖宿曉汲清湘燃楚竹煙消日出不見人
欸乃一聲山水綠此柳宗元欸乃曲也見本集有誤作
晚唐人詞者非也當以音調辨之猶徐昌圖以詞名而
誤入宋詞唐宋之音尚不能辨况中晚乎

古今
詞話



御選歷代詩餘卷一百十一

欽定四庫全書

集部

御選歷代詩餘卷一百十三

詳校官中書_臣潘有為

侍讀_臣孫球覆勘

總校官進士_臣朱鈐

校對官編修_臣沈清藻

謄錄監生_臣邵颿

欽定四庫全書

御選歷代詩餘卷一百十二

司經局洗馬掌局事兼翰林院修撰加二級臣王奕清奉

旨校刊

詞話

唐二

韋應物曉音律夜泊靈壁舟中聞笛聲謂酷似天寶梨園法曲李謩所吹者詢之乃謩外甥許雲封也韋授以李謩笛許曰此非外祖所吹者遇至音必裂強令試之

遂吹六州徧一疊而裂

樂府
紀聞

韋蘇州性高潔所在焚香埽地惟顧況皎然輩得與倡

酬其小詞不多見惟三臺令轉應曲流傳耳

唐詩
記事

金壇戴叔倫有轉應曲云邊草邊草邊草盡來兵老山

南山北雪晴千里萬里月明明月明月哀笳一聲愁絕

即調笑令也筆意回環音調宛轉與韋蘇州一闋同妙

韋詞云河漢河漢曉挂秋城漫漫愁人起望相思塞北

江南別離離別離別河漢雖同路絕

古今
詞話

陶峴者彭澤之子孫也家於崑山泛舟江湖徧遊煙水
往往數歲不歸自製三舟一舟自載一舟載賓客一舟
載飲饌客有前進士孟彥深孟雲卿布衣焦遂善為詞
調峴有女樂一部奏清商之曲逢奇勝則窮其景物盡
興而行吳越之士號為水仙

甘澤
謠

劉賓客官蘇州刺史李司空罷鎮日暮其名招致之出
伎佐觴劉賦春風一曲杜韋娘司空呼伎歸之

耆舊
續聞

劉夢得在沅湘日以里歌俚鄙乃依騷人九歌作竹枝

九章教里中兒由是盛於貞元元和之間每歲正月里
中兒聯歌竹枝吹笛擊鼓以應節歌者揚袂睢舞以曲
多為貴聆其聲音中黃鐘之羽卒章訐激如吳歛雖傖
儻不可分而含思宛轉有淇澳之豔

劉禹錫
竹枝序

劉禹錫別有瀟湘神詞云斑竹枝斑竹枝淚痕點點寄
相思楚客欲聽瑤瑟怨瀟湘深夜月明時亦竹枝之流
也

草堂
箋

春去也多謝洛城人弱柳從風疑舉袂叢蘭浥露似沾

巾獨坐亦含顰劉賓客詞也一時傳唱乃名為春去也

曲

古今
詞話

柳枝樂府作折楊柳為漢饒歌橫吹曲上馬不捉鞭反
拗楊柳枝蹠坐吹長笛怨煞行客兒蓋邊詞別曲也舊
詞如劉禹錫云清江一曲柳千條二十年前舊板橋曾
與美人橋上別更無消息到今朝一曰壽杯詞如千門
萬戶喧歌吹富貴人間只此聲年年織作昇平字高映

南山獻壽觴語意自別

古今
詞話

唐無名氏柳枝云萬里長江一帶開岸邊楊柳是誰栽
錦帆落盡西風起惆悵龍舟更不回盡推此曲為第一
然不若薛能楊柳枝云汴水高懸百萬條清風兩岸一
時搖隋家力盡虛栽得無限春風屬聖朝更得大體

古今

詞話

周德華在崔蜀言郎中席上唱柳枝如劉禹錫之春江
一曲柳千條賀知章之碧玉栽成一樹高楊巨源之江
邊楊柳麴塵絲而不取溫庭筠裴誠所作二人有愧色

耆舊

續聞

元稹歌曰櫻桃花一枝兩枝千萬朵花磚曾立采花人
窄破羅裙紅似火此亦長短句比章臺柳少疊三字

古今

詞話

稹長於詩詞與白居易名相埒天下傳諷往往播於樂

府穆宗在東宮日妃嬪近習皆歌之宮中呼為元才子

唐詩

紀事

白居易在洛作柳枝詞云一樹春風萬萬枝嫩於金色

欽定四庫全書

御選歷代詩餘

四

軟於絲永豐東角荒園裏盡日無人屬阿誰有人歌之
聞於宣宗因命移永豐柳二枝植內庭白復作詞云一
樹衰殘委泥土兩枝移植在天庭定知此後天文裏柳
宿光中添兩星

唐詩
紀事

白樂天詞云花非花霧非霧夜半來天明去來如春夢
不多時去似朝雲無覓處蓋其自度之曲因情生文雖
高唐洛神奇麗不及也張子野衍之為御街行亦有出

藍之色

楊慎

白樂天長相思望江南緝麗可愛非後世作者可及花

非花一首尤纏綿無盡

花卷
詞客

唐有杜秋娘歌行相傳是金陵女子為浙西觀察使李
錡妾錡有陰謀秋娘時解勉之嘗為錡製小詞云勸君
莫惜金縷衣勸君莫惜少年時有花堪折君須折莫待
無花空折枝後錡敗籍入宮此蓋以詞隱諫者唐詞選
為金縷曲今尚存金縷巷名則不獨挑葉桃根專美於

秦淮也

客座
贊語

王仲初以宮詞百首著名三臺令轉應曲其餘技也

花卷

詞客

王建霓裳詞云弟子部中留一色聽風聽水作霓裳今
教坊尚存其聲而其舞則廢不傳矣近世有望瀛府獻
仙音二曲乃其遺聲也霓裳曲前世傳記論說頗詳不
知聽風聽水為何事白樂天有霓裳羽衣歌甚詳亦無
風水之說第記之必有知者爾

六一
詩話

歐陽永叔以不曉聽風聽水作霓裳為疑按唐人西域

記龜茲國王與其臣庶之知樂者於大山間聽風水聲
均節成音後翻入中國如伊州甘州涼州等曲皆自龜
茲所致雖未及霓裳而其製曲亦用其法此說近之

蔡條

詩話

唐明皇改婆羅門引為霓裳羽衣屬黃鐘商時號越調
白樂天嵩陽觀夜奏霓裳詩云開元遺曲自淒涼况近
秋天調是商知其為黃鐘商無疑歐陽永叔知霓裳羽
衣為法曲而以望瀛府獻仙音為其遺聲不明宮調亦

太疎矣

碧雞漫志

莆中逍遙樓楮上有唐人橫書類梵字相傳是霓裳譜

字訓不通莫知其說或謂今都下獻仙音乃其遺聲

筆談

同州樂工翻黃幡綽霓裳譜人以為非是仍依法曲造成伶人花日新見之題其後云法曲雖精莫近望瀛

嘉祐

雜志

唐憲宗時每大宴作霓裳舞文宗時詔太常卿馮定採開元雅樂製雲韶雅樂是時霓裳曲四方大都邑及士

大夫家已多按習而文宗乃加考訂製為舞曲因曲存而舞節非舊故加整頓耳李後主作昭惠后誄云霓裳羽衣曲經茲兵火世罕聞者偶獲舊譜殘缺頗甚暇日與后詳定去其淫繁定其缺墜蓋霓裳曲在唐末已不

全矣

碧雞漫志

白樂天和元微之霓裳羽衣歌曰磬簫箏笛遞相橫擊擲吹彈聲迤邐註云凡曲之初衆音不齊金石絲竹次第發聲霓裳序之初亦復如此又曰散序六奏未動衣

陽臺宿雲慵不飛中序劈砑初八拍秋竹吹裂春冰折
註云散序六徧無拍故不舞中序始有拍乃舞又曰繁
音急節十二徧跳珠撼玉何鏦錚翔鸞舞罷却收翅唳
鶴曲終長引聲註云霓裳十二徧而曲終凡曲將終皆
聲拍促速惟霓裳之末長引一聲通計霓裳曲凡十二
疊前六疊無拍至第七疊謂之疊徧自此始有拍而舞
矣沈存中筆談指霓裳為遺調法曲未嘗見舊譜豈亦
得於樂天之詩乎

碧雞漫志

開元中樂工李龜年兄弟三人皆有盛名彭年善舞鶴
年龜年善歌製渭州六么亦奏霓裳羽衣特承顧遇

明皇

雜錄

六么一名綠腰一名錄要唐史吐蕃傳云奏涼州渭州

錄要雜曲段安節琵琶錄云綠腰本錄要也樂工進曲

必令錄其要者青箱雜記云曲有綠腰乃霓裳羽衣之

要拍也

碧雜漫志

康崑崙琵琶第一手兩市鬪樂崑崙居東綵樓彈新翻

欽定四庫全書

人

御選歷代詩餘

卷一百十二

八

羽調綠腰自謂無敵手矣曲罷市之西絲樓出一女郎
抱樂器云我亦彈此曲兼移在楓香調中撥聲如雷雨
交集奇妙入神崑崙悵然自失願拜為師女郎更衣出
乃僧善本俗姓段者是也

碧雞
漫志

張紅紅者大厯初隨父丐食遇將軍韋青因其善歌乃
納為姬穎悟絕倫有樂工取西河長命女加減節奏頗
有新聲未進內廷先歌於韋青宅第青令紅紅隔屏聽
之以小豆合數記其拍紒之云女弟子久歌此非新曲

也隔屏奏之一聲不失且云曲中有一聲不穩今已正之矣樂工大驚拜伏嗟歎不已尋詔入內庭宜春院寵澤隆異宮中號為記曲娘子即拜才人

勝說

李益詩名早著征人歌一篇好事者畫為圖障回樂峰

前沙似雪天下唱為歌曲

唐語林

韓翃字君平有友人每將妙妓柳氏至其居窺韓所與往還皆名人必不久貧賤許配之未幾韓從辟淄青置柳都下三歲寄以詞章臺柳章臺柳昔日青青今在否

縱使長條似舊垂也應攀折他人手柳答以詞揚柳枝
芳菲即可恨年年贈離別一夜隨風忽報秋縱使君來
豈堪折後為番將沙叱利所劫有虞候許俊詐取得之

詔歸韓

太平
廣記

韋蟾字隱珪下杜人廉問鄂州罷還賓客祖餞蟾書文
選句云悲莫悲兮生別離登山臨水送將歸以牋毫授
賓從請續其句逡巡有伎泣然起曰某不才不敢染翰
欲口占兩句韋大驚異隨令念曰武昌無限新栽柳不

見楊花撲面飛座客無不嘉歎韋令唱作楊柳枝詞

唐詩

紀事

太和中文宗於內殿看牡丹翹足憑闌忽吟舒元興壯
丹賦云坼者如語含者如咽俯者如愁仰者如悅吟罷
方省元興詞不覺歎息良久泣下沾襟時有宮人沈阿
翹者為舞何滿子調聲風態率皆宛轉曲罷賜金臂環
即問其從來翹曰妾本吳元濟之伎女元濟敗因以聲
得為宮人俄遂進白玉方響云本元濟所與也光明皎

潔可照十數步犀槌即響犀也方物有聲乃響應其中
焉架則雲檀香也文彩若雲霞之狀芳馥著人彌月不
散制度精妙非中國所有因令阿翹奏涼州曲音韻清
越聽者無不凄然謂之天上樂乃選內人與阿翹為弟

子焉

杜陽
雜編

開成中高鎔知舉內出霓裳羽衣曲賦太學創置石經
詩進士復試詩賦自此始也

盧氏
雜說

京師景德寺東廊三學院壁間題云明月斜秋風冷今

夜故人來不來教人立盡梧桐影相傳呂洞賓題也

唐漢

詩話

大梁景德寺峨眉院壁間有呂洞賓題字寺僧相傳以
為頃時有蜀僧號峨眉道者戒律甚嚴不下席者二十
年一日有布衣青裘昂然一偉人來與語良久期以明
年是日復相見於此願少見待也明年是日日方午道
人沐浴端坐而逝至暮偉人果來問道者安在曰亡矣
偉人歎息良久忽不見明日見數語於堂側壁間絕高

處其語云落日斜西風冷幽人今夜來不來教人立盡
梧桐影字畫飛動如翔鸞舞鳳非世間筆也

竹坡詩話

如夢令小石調曲有傳自莊宗者有傳自呂僊者莊宗
於宮中掘得石刻名曰古記復取調中二字為名曰如
夢令所謂如夢如夢殘月落花煙重是也不知先曾有
一闋云嘗記溪亭日暮沉醉不知歸路興盡欲回舟誤
入藕花深處爭渡爭渡驚起一行鷗鷺傳是呂僊之曲
別刻又云無名氏作非呂僊也張宗端寓以新詞曰比

梅近選以莊宗曾宴桃源深洞又名曰宴桃源

古今詞譜

解紅相傳為呂仙作余考解紅為和魯公歌童其詞曰
百戲罷五音清解紅一曲新教成兩箇瑤池小仙子此
時奪却拓枝名魯公自製曲也按解紅舞衣紫緋繡襦
銀帶戴花鳳冠五代時飾焉有呂仙在唐李預為此腔

耶

物外清音

司空圖隱王官谷自目為耐辱居士豫為冢棺遇勝日
引客坐壙中賦詩詞徘徊不已客或難之則曰君何不

廣也生死一致吾寧暫遊此中哉每歲時祠禱歌舞與
閭里耆老相樂有酒泉子詞云買得杏花十載歸來方
始坼假山西畔藥欄東滿枝紅旋開旋落旋成空白髮
多情人更惜黃昏把酒祝東風且從容

唐詩
紀事

凡寫迷離之況者止須述景如小牕斜日到芭蕉半牀
斜月疎鐘後不言愁而愁自見因思韓致光空樓雁一
聲遠屏燈半滅已足色悲涼何必又贅耆山正愁絕耶
覺首篇時復見殘燈和煙墜金穗如此結句更自含情

無限

詞筌

韓偓小字冬郎父瞻李義山同門也偓嘗即席為詩相
送義山喜贈之有十歲裁詩走馬成及雛鳳清於老鳳
聲句其生查子二首風致過人

唐詩
紀事

韓冬郎浣溪紗絕非和魯公之嫁名者亦以香蕋名詞

全芳

備祖

溫庭筠舊名岐以難聲茅店月人跡板橋霜句知名才
思敏捷入試日凡八义手而八韻成多為鄰鋪假手沈

詢知貢舉別施一席試之或曰潛救八人矣詞有金荃

集蓋取其香而軟也

北夢
瑣言

宣宗愛唱菩薩蠻令狐綯假溫庭筠手撰二十闋以進

戒勿泄而遽言於人且曰中書堂內坐將軍以譏其無

學也由是疎之

樂府
紀聞

趙崇祚花間集載溫飛卿菩薩蠻甚多合之呂鵬尊前

集不下二十闋

古今
詞話

溫飛卿才思豔麗與李義山齊名號溫李一日義山謂

曰近得一聯句遠比趙公三十六年宰輔未有偶溫曰
何不云近同郭令二十四考中書宣宗嘗賦詩上句用
金步搖未有對遣索進士對之溫乃以玉條脫續之宣
宗賞焉又有藥名白頭翁溫以蒼耳子為對他皆類此
宣宗好微行遇於逆旅溫不識龍顏傲然詰之曰公非
長史司馬之流帝曰非也得非六參簿尉之類帝曰非
也後謫為方城尉最善鼓琴吹笛云有絲即彈有孔即
吹不必柯亭爨桐也著乾騷子不傳有握蘭集金荃集

漢南真橐

唐詩
紀事

溫李齊名或謂溫不如李徒以溫多香艷之詞耳然亦有彼此互勝者李七夕詩云清漏漸移相望久微雲未接過來遲溫七夕詞云蘇小橫塘過桂楫未應清淺隔牽牛皆妙於荒唐事說得真實李隋宮詩云玉璽不緣歸日角錦帆應是到天涯溫春江花月夜詩云十幅錦帆風力滿連天展盡金芙蓉雖竭力描寫豪奢不及李語能狀無涯之態至其結句云地下若逢陳後主豈宜

重問後庭花溫云後主荒宮有曉鶯飛來只隔西江水

則溫語含蓄多矣

詩話
又編

薛昭緯恃才傲物每入朝省弄笏而行旁若無人好唱浣溪紗詞知舉後有一門生辭歸鄉里臨岐獻規曰侍郎重德某乃受恩爾後請不弄笏與唱浣溪紗幸甚時

人以為至言

北夢
瑣言

宣宗製泰邊陲曲

杜陽
雜編

唐昭宗宮人作巫山一段雲二首或以為昭宗作二首

各一體比舊調用六字句換頭而第二首結句換韻

尊前集

乾寧三年昭宗次華州韓建迎歸郡中帝鬱鬱不樂每
登城西齊雲樓遠望明年秋製菩薩蠻詞云登樓遙望
秦宮殿茫茫只見雙飛燕渭水一條流千山與萬丘遠
煙籠碧樹陌上行人去何處是英雄迎儂歸故宮

中朝故事

徐昌圖唐人冬景木蘭花一詞絢麗可愛今入草堂之

選然莫知為唐人也

詞品

尊前集有徐昌圖臨江仙河傳二首俱唐音也按昌圖

為肅宗時進士至宋太宗時世次遙遙而必欲屈之為

博士以列於宋人不可解也或云是兩人

古今詞話

仄韻絕句唐人以入樂府謂之阿那曲女郎姚月華歌
二首即手拂銀瓶秋水冷煙柳瞳矐鵲飛去也其夫北

遊感其詞而歸

古今詞譜

太平廣記載妖女一詞云五原分袂真吳越燕拆鶯離
芳草歇年少烟花處處春北邙空恨清秋月其詞亦佳
詞品

鄭繼超遇田叅軍贈妓曰妙香留數年告別歌北邙月

送酒明日偕過北邙化狐而去

洞微志

唐中涓宿宮妓館見童子捧酒核導三人至皆古衣冠
相謂曰崔常侍來何遲俄一人至有離別意共聯四句

為字字雙曲牀頭錦衾斑復斑架上朱衣殷復殷空庭

明月閒復閒夜長路遠山復山

才鬼錄

賈人女裴玉娥善箏與黃損有婚姻約損贈詞云無所
願願作樂中箏得近佳人纖手子研羅裙上放嬌聲便

死也為榮後為呂用之劫歸第賴胡僧神術復歸損詞

內七言二句本唐崔懷寶詩多有以此詞為崔作者

詩餘廣選

門外獨兒吠知是蕭郎至剗鞦下香階冤家今夜醉扶
得入羅幃不肯脫羅衣醉則從他醉還勝獨睡時此唐
人詞也前輩謂讀此可悟詩法或以問韓子蒼子蒼曰
只是轉折多耳且如喜其至是一轉也而苦其今夜醉
又是一轉入羅幃是一轉矣而不肯脫羅衣又是一轉
後二句自家開釋又是一轉直是賦盡醉公子也

懷古錄

東都防河卒於濬汴日得一石刻有詞無調撫詞中四字名之曰魚遊春水教坊倚聲歌之詞云秦樓東風裏燕子還來尋舊壘餘寒猶峭紅日薄侵羅綺嫩草方抽碧玉簪嬌柳輕拂黃金縷鶯轉上林魚遊春水幾曲闌干徧倚又是一番新桃李佳人應怪歸遲梅妝淚洗鳳簫聲絕無歸雁望斷清波無雙鯉雲山萬重寸心千里凡八十九字而風花鶯燕動植之物曲盡此唐人語也

宣和間掘地得石刻一詞唐人作也本無名後人名之
為後庭宴云千里故鄉十年華屋亂魂飛過屏山簇眼
重眉褪不勝春菱花知我銷香玉雙雙燕子歸來應解
笑人幽獨斷歌零舞遺恨清江曲萬樹綠低迷一庭紅
撲簌

詞苑

長命西河女羽調曲亦名薄命女唐五言體云雲送關
西雨風傳渭北秋孤燈燃客夢寒杵搗鄉愁和凝有長
短句云天欲曉宮漏穿花聲繚繞牕裏星光少冷霞寒

侵帳額殘月光沉樹杪夢斷錦闌空悄悄強起愁眉小

力崇詞格者當不取詩體也

樂府
解題

政和中京師有姥入內教歌傳得禁中擷芳詞一名摘
紅英張尚書帥成都日人競歌之却於前段記得年時
共伊曾摘其下添憶憶憶三字換頭落句燕兒來也又
無消息於下添得得得三字擷芳擅芳禁中園名

太平
樂府

滿江紅仙呂宮曲教坊記有此名唐人冥音錄所載上

江虹即此彭芳遠有平聲詞

古今
詞譜

七言八句與七言四句見諸歌曲者今止小秦王瑞鷓鴣耳瑞鷓鴣猶依字易歌若小秦王必雜以虛聲乃可

歌也

茗溪
漁隱

唐詞多述本意有調無題如臨江仙賦水媛江妃也天仙子賦天台仙子也河瀆神賦祠廟也小重山賦宮詞也思越人賦西子也有謂此亦詞之末端者唐人因調而製詞故命名多屬本意後人填詞以從調故賦詠可

離原唱也

沈際
飛

唐人歌詞皆七言而異其調渭城曲為陽關三疊楊柳枝復為添聲采蓮竹枝當日遂有排調如竹枝女兒年少舉掉同聲附和用韻接拍不僅雜以虛聲也

古今詞譜

唐人曲調皆有詞有聲而大曲又有豔有趨有亂詞者其歌詩也聲者若羊吾夷伊那何之類也豔在曲之前趨與亂在曲之後亦猶吳聲西曲前有和後有送也

詞品

詩至晚唐五季氣格卑陋千家一律而長短句獨精巧高麗後世莫及此事之不可曉者

陸游

當開元盛日王之渙高適王昌齡詞句流播旗亭而李
白菩薩蠻等詞亦被之歌曲逮及花間蘭畹香薇金荃
作者日盛古詩之於樂府律詩之於詞分鑿並轡非有
後先有謂詩降而詞以詞為詩之餘者殆非通論

玉茗堂
選北間

集
序

御選歷代詩餘卷一百十二